

KUMPUAN
RAM LEH HNAM
HUMHALH

YMA

AW



CHANMARI WEST BRANCH YMA CHANCHINBU KARTIN CHHUAK. VOL. XXIV. ISSUE NO.46 17th November 2013

Hnatlang Runpui Neih a ni

Chanmari West, 17th November, 2013 : Chanmari West Branch YMA Executive Meeting-in a lo rel tawh, Ni 2.11.2013 (Inrinni)-a Chanmari West leh Hunthar veng inrina hmuna Faina hnatlang neih tum chuh veng chhungah Chhiat tawk kan awm avangin Ni 14.11.2013 (Ninga) khan neih a ni ta zawk a ni.

Ni 14.11.2013 (Ninga) zing dar 7:00 khan Chanmari West leh Hunthar Veng inrina, tlak lam Pu Chhawnzinga tuikhuah bul velah hian Kawngkam hnime samfai leh kawngpui dung hnawkte thianfaiin Chanmari West Branch YMA member-te hnatlanga thawh chhuah a ni a. He hnatlangah hian Chanmari West Branch YMA member 59 an thawk chhuah a, hnatlanga thawk chhuakte chungah hian Branch YMA chuan lawmthu a sawi rualin kan Branch huam chhunga member zat atanga chhuta hetiang zat chauh kan thawk chhuah chu pawi a ti hle. YMA member-te YMA activities ngai pawimawh deuh deuh turin a ngen bawk.



Branch YMA Hnatlanga thawk chhuakte

(Thlalatu - Chda)

Wallet tibo tan

Laltanpuia Aizawl Venglai chuan Lalchhanchhuaha s/o Lalramthara, Chanmari West ta ni ngeia hriat wallet a chhar a, a chhungah license leh pawisa a awm. A neitu chuan a chhartu mobile phone number 8415063619-ah zawh fiah theih a ni.

RUANG CHHUAK

Ni 15.11.2013 (Zirtawp) zan khan, Vansangkimi (Thla 4) d/o Lalchawimawia, Mualkhang khua, Synod Hospital-a boral chu a ruang Pu Tlanglungmuana (CH-sect) in atangin thawn chhuah a ni.

PEM

- Pu Ralkhama te chhung member 3, Pu Rosanga in, T-Sect. atangin Chhingga vengah.
- Tv A Lalthianghlima te unau member 3, Pu Lalremruata in, N-Sect. atangin Khatla-ah.

THISEN PEK RUNPUI

Dec ni 13, 2013 (Zirtawp) ni hian ZOFA Cultural Club-te huaihawtin a mamawhtute hman atan Aizawl Civil Hospital-ah Thisen Pek Runpui neih tum a ni a, veng mipuite Thisen pe theih theuh turin ZOFA Cultural Club chuan an sawm. Thisen pe theih turtie chuan tun thla (November) chhung ngei hian ZOFA Cultural Club Asst. Secy, Mangheta (Ph no-9862358337) ah inhriattir tur a ni e. Club member-te phei chu pe thei ngei tura beisei an ni.

Branch News

- Branch Indoor Sports neih mekah Executive Member-te leh YMA member-te a tam thei ang ber tel thin turin Branch YMA chuan a ngen.
- Branch Executive Member Pu Lalchhanhima Office duty a hmar tlangdung leh khaw thlang lama zin pawh dam takin a lo haw leh ta.
- Branch Executive Member Dr Lalramliana Kohhran thila Saiha a zin pawh dam takin a lo haw leh ta.
- Ni 13.11.2013 (Nilaini) a Central Co-ordination Committee Meeting CYMA Hall-a neihah Vice President Pu K Darthantluanga (CEC) leh Branch aiawhin Treasurer Pu R Lalhmachhuana te an tel.
- Ni 14.11.2013 (Ninga) zing khan Hunthar veng nena inrina Chhawnzinga tuikhuah thlang kawngpui dung sam faia Branch hnatlang neihah member 60 bawr thawh chhuah a ni.
- Branch Adviser Pu F Zosanga khawchhak lam zin pawh dam takin a lo haw leh ta.
- Branch Adviser Pu Lalrengpua Sailo Presbyterian Kohhran Special work camp Lalchhora-ah a zin mek.
- Veng chhunga dawr neite puak thei thil leh silai lem (a mu nei) zuar lo turin Branch YMA chuan a ngen.
- YMA member-te Branch/Section activity hrang hrangah tan la lehzual turin Branch chuan a ngen.
- Chhiatni Fund leh Silver Jubilee Fund khawnsate kawl khawm mai lovin Branch Fin.Secretary Pu Lalrinliana hneneh a rang lama thehluh zel tur a ni e.



TUNKAR CHANGVAWN

Nang anga khawlohma ngaidamtu leh a ro chan la awm chhun bawhchhiatnd kal peltu Pathian tu nge awm? A thinrimna chu kumkhain a vawng reng lo, khawngaihnaah a lawm em em thin avangin. Mika 7:8

Editorial Board

Editor:	R Lalrinngheta	9862358337
Joint Editor :	Lalchhandama	9862358347
	J Lalnangliana	9862399658
News Editor :	Thangkhuma	9862303135
	Lalchhuanmawia	9862580558
	K Lalremtluanga	9862119608
Cir.Manager :	Jacob Lalrinsanga	9612319779
Production Manager :	RL Thanhnuna	9436152760

Branch Office Bearer

President	C Lalzarliana	9436142049
Vice President	K Darthantluanga	9436196071
Secretary	Zairemmawia	9862385654
Asst. Secretary	RL Thanhnuna	9436152760
Treasurer	R. Lalhmachhuana	9436151817
Fin.Secretary	Lalrinliana	9862581814
Adviser-te :	Pu F Zosanga	9436142106
	Pu A Biaklawma	9436363169
	Pu Lalrengpuia Sailo	9862075614

Editorial:

Chanmari West veng mi, thalai tan chuan ti ti dang a leng tak tak thei rih lo ani e. Infiamnain kan rilru a luah hneh viau. MPL season 2-na, thawhkhhatna (1st Phase) chu tluang taka khelh zawk a ni ta. CWFC chuan hnehna nen 1st phase an khar thei a, an lawmpuiawm takzet. Local Council Volleyball Team (Mipa) in Inter-Village Tournament-ah Final an lut bawk nen, sawi a nuamin, veng dang kan awt lo viau.

Khawvela intihsiakna (*a bik takin infiamna lam lo thlir ila*) hrang hranga mi hlawhtlingte han hmuh hian, an thawhrimna lam aia an par chhuak tawh lo awh ve mai hi a awl viau. Hlawhtling tura an beih nasatzia han hriat chiah hian an ropuina chu a zual thin.

Hlawhtlinna hi vanneih thila chhar fuh theih a nih rualin, infiamna lam bikah kher hi chuan thawhrimna tel lo chuan a theih loh ti ila kan sawi sual kher awm lo ve. C Ronaldo-in training a neih nasat dan hriatpui miah lova a ball pet dan entawn ngawt chuan tih ve mai chi a ni hauh lo vang.

Kan venga infiammite pawh hian **Thawhrimna** hlutzia leh a rah chhuah hi hrechiang se, tun aia thahnemngai lehzual hian han thawk se, chakna chu khel lovin an tawngbaw ngei ang le.

Engpawhnise, tun aia tha leh zuala inkhel chhunzawm zel turin duhsakna sang ber kan hlan e.

Article**Chanmari West Football Club kan che tha**

T-a

Hmuu dan a inang lo thei a, ka ngaih dan chuan 2013-14 Mizoram Premier League season chanve thlenga kan thlen chinah kan che tha thaw khat hle niin ka hria.

Kai thar awm chhun kan ni a, MPL khel tura tling tlai ber kan ni bawk nen, player tha kawl sa kan neih loh piah lamah la lut turin hun kan nei tlem ber.

MPL team pariatte sum hman tur ruahman enin Chanmari West-in budget a nei tlem ber a, sum hmang hnem ber tura ngaih Mizoram Police leh Aizawl FC-ten inkhaikhin phei chuan an sum ruahman hmun ruka thena hmun khat vel bak kan nei pha lo.

Squad hrang hrang leh player kan neih dan enin title chuh pha lo tura rin kan ni a, season tir atanga tlak hniam pumpelh tuma bei tura ngaih kan ni bawk. Chumai bakah team pariat zinga tawn hriat nei lo awm chhun kan ni tel a, tehna hrang hrang atangan mite ngaihah che tha tura rin kai kan ni pha lo hrim hrim.

Season khat chhungin league vawi 14 kan khel dawn a, vawi sarih zo tawhin point riat kan thawk chhuak a, point khat min paihsak. Kulikawn leh Reitlang kan hneh a, champion lai Dinthar leh cup chi hrang pathuma champion Chanmari kan inhnehtawkpui bawk.

Police, Luangmual leh Aizawl FC lakah kan tlawm thung. Point sarih nen season chanve kan hmang a, pasarihnaah awmin kan hnuaih point thum nei Reitlang an awm a, parukna Kulikawn nen kan point hmuh a inzat.

A mawngah awm ila, kan duh dan ni lo mah se football thlirna tlanglawn atangan thil awm tak a ni ngei ang. Mahse, Chanmari West hian khel tha tura team mamawh thahru pawimawh tak pakhat kan nei a, team dang zawng aiin kan nei tha zawk niin ka hria a, chu chu mipui an ni.

Player-ten phurna an neih a ngai a,

chak duhna tak tak nen an khelh a tul a, keini team phei chuan kan mamawh lehzual ang. Chak loh hrehawm tikhawpin mipui thlawpna tha an dawng a, hei hian thahru tam tak a siamsaka, football chanchina team tha ber ber pawhin hei thil hi mamawh loh lai an nei lo.

Club football-a fan nei tha leh a hmuna entu nei tam ber German team-te tichaktu a ni fo. A bikin tunlai football-a club thlawpna tha bera an sawi mek chu Borussia Dortmund fan-te an ni. England-ah pawh inkhel se mualneitu aiin thawm an nei tha a, an team-te n tlawm chang nei mah se an 'boo' khum ngai lo. Lungawi lohna an neih fote mualphona thlen khawpa an kalpui thawm kan hre khat hle. Signal Iduna Park-ah league an khel a nih chuan mipui 80,000 aia tam pungkhawm ziah ang an ni a, he "Yellow Wall" aia hmuhnwam leh ngaihnawm hi tunlai football fan rual zingah an awm lo.

German club-ten suma lei theih loh thahru pawimawh leh hlu em em an neih ang hi tlema zawng kan kawl a, MPL club zingah keini aia chang tam an awm lo. Anmahni tantu tam takte hmuh laia tlawm aia hrehawm hi player tan a awm lo va, a hmuna thlawptu nei tam lo team reng rengin beisei aiin an khel tha khat khawp a; rin aiin an khel chhe deuh ziah. Chu chu home advantage emaw away disadvantage emaw tia kan sawi thin hi a ni. Eng vang nge ? Mipui thawm tha tak hmanga phurna leh chak duhna tak tak thnlung nei reng tura nawrtu a kotlang atangan an awm miau loh chuan, player-ten minute 90 chhungin an theihna mar taka hman tluan parh an harsat a, inthlahdah palh a awl em em.

Season chaw hnu lamah player-te atangan hmasawnna kan beisei sang a, mipui lam pawh hmasawnna tur nei ve tho kan ni. Hmasawn hi engti zawng pawhin a tha em em a ni.

Chawngbawla Section

- An member C Darthanchama (Achama) chuan Ni 15.11.2013 (Zirtawp) khan nupui tha tak a nei a, an lawmpuiin chhungkaw hlim tak din thei ngei turin duhsakna an hlan.
- An committee member Pu R Lalhmingthanga (Taitea) chu a nu Kaichhungi, kum 83 (Sialhawk a awm) chuan a boralsan a, an tawrhpui hle. Ni 17.11.2013 (Pathianni) chawhnu dar 3:00 hian section committee-in ral tur a ni a, kim taka kal turin an inhriattir.
- Branch YMA Indoor Sport neih mekah member a tam thei ang ber tel thin turin an insawm.
- Pu Lianchhunga Synod Hospital-a awm mek chu dam taka a lo chhuah leh thuai an duhsak.
- Ni 22.11.2013 (Zirtawp) zan hian YMA Park-ah veng pum huap Beat Contest ropui takin an buatsaih dawn a, veng pawn atang pawhin Band tha tak tak an inlan ang. Scavenger Rock Idol III-a pakhatna Ably-te leh hmeichhe band lar Apples te an rawn che dawn. Ni 22.11.2013 tukthuan ei kham hian Beat contest atan YMA Park-ah hnatiang koh a ni a, thawkchhuak theuh turin member-te an insawm.

Khuangchera Section

- Ni 12.11.2013 (Thawhleh) zan khan YMA RUN-ah meeting an nei a, thu pawimawh tak tak rel a ni.
- Branch buatsaih section wise Indoor Sports OB category-ah Final an lut a. Pakhatna nih ngei an tum ruh hle.
- Leader-te pahnih Pu Lalchhanhima leh Pu HV Lalhavela te pawh an zinna atangin dam takin an lo haw leh ta.
- Section Wise Indoor Sports-ah Section aiawha tel tur zawng zawngte'n hlawhtlinna chang ngei tura tha taka khel turin duhsakna an hlan a. Heng mite hi Item hrang hranga incharge tura ruatte an ni.
- 1. Volleyball - Pu TC Lalthangliana leh NI. Lalchhandami
- 2. Table Tennis - Tv. F Lalhruaitluanga
- 3. Badminton - Pu Lalliansanga
- Hun remchangah bungraw enfel hnatiang neih an tum.

Neuva Section

- Ni 12.11.2013 (Thawhleh) zan khan committee an nei a. Hmalakna tur tam tak an rel a, member te tawiawmna an ngen.

□ Tlawmngai a 'Kawngpui Ningkhawng' lehkhabu zawsak tute chungah committee chuan lawmthu a sawi.

□ Ni 16.11.2013 (Inrinni) zing khan section huam chhungah Faina Hnatlang neih a ni a, hnatiang a thawkchhuak zawng zawng chungah committee chuan lawmthu a sawi. Nilengin hruaituten bungraw check hnatiang an nei bawk.

□ Vawiin Ni 17.11.2013 (Chawlhi) tlai dar 3 hian hruaitute Pasaltha Neuva Inah kal khawm tur a ni.

□ Chhung tinte mahni in leh a vel vawngfai theuh turin an inchah.

□ An hruaitu Pu Michael Lalhriatpuia fanu damlo chu a dam leh thuai an duhsak hle.

□ Branch YMA, Indoor Sport neih mekah member a tam thei ang ber thawkchhuak thin turin an in ngen. Ni 18.11.2013 (Thawhlan) zan dar 7:30 hian Batminton leh Table Tennis te khelh tur a ni a, In charge chu

Volleyball (Mipa): Pu Ricky Lallawmkima

Volleyball (H): NI K Lalruatsangi Badminton: Tv Lalmuanpuia Zawngte

Table Tennis: Pu Michael Lalhriatpuia

□ Krismas a hnai leh ta a, Section huam chhung a lo thiaghlim zawk theih nan section huam chhungah ruihtheih thil zuar hria kan awm chuan a rang thei ang ber a hruaitute hriattir vat thin turin an in ngen.

□ Branch buatsaih section wise Indoor Sports Special category-ah Final an lut a, Khuangchera section OB-te hneh an tum hle.

Taitesena Section

□ Ni 12.11.2013(Thawhleh)zan khan section committee an nei a, thu pawimawh tak tak an rel.

□ Ni 9.11.2013 (Inrinni) khan Pu Ngaihlea Workshop-ah Kuang duangin an hnatiang.

□ CWBYMA Indoor Sport neih mekah member a tam thei ang ber tel turin an in ngen.

□ Section aiawha Sport Item a tel tura ruatte an tihhawhtlin ngei an beisei a, harsatna avanga tel thei lo tur chuan a rang thei ang bera Section Secy hnenah in report turin an inhriattir nghal bawk.

□ CWBYMA Indoor Sport neih mekah Item-Incharge atan a hnuai ami te hi an ruat.

Volleyball (Mipa):

Tv Malsawmtluanga (Mala)

Volleyball (Hmeichhia):

NI H Lalremtluangi & Tv Malsawmtluanga
Badminton: Pu Lalbiakkima Sailo
Table Tennis: Pu Lalhmingliana (Puia)

□ Ni 16.11.2013 (Inrinni) khan Y.M.A Chhang member te leh Section hruaituten faina hnatiang an nei.

□ Vengchhung kawng siam mek ah Section hruaitute remchan danin an duty thin.

Vanapa Section

□ Ni 14.11.2013 (Ningani) khan Siloam Picnic Spot (Lengpui)-ah intihhlimna hun an nei a, YMA member 85 an kal a, an hlim thang hle. Branch Asst Secretary Pu RL Thanhnuna chuan he hun hi a hmanpui a, an lawm hle.

□ Branch YMA Indoor Sport neih mek chu Ni 18.11.2013 (Thawhlan) zan inkhawm ban hian chhunzawm leh tur a ni a, member-te kal theuh turin an insawm. Sport-atan hian hetiang hian In charge an insiam:

- 1) Volleyball (Mipa)
Tv Lalduhawma Hnamte
- 2) Volleyball (Hmeichhia)
NI Melody Lalhriatkimi
- 3) Badminton
Pu RK Ramherliana
- 4) Table Tennis
Pu John Lalduhawma

□ Asst Secretary Pu R Vanlalsawma, Tualcheng lama zin chu dam takin a lo haw leh ta.

□ NI R Lalramengzami te unau Mumbai lama in check up-a thang mek chu dam taka an lo haw leh ngei an duhsak.

□ Kolkata lama in check up-a kal Annie Zothansangi chu dam takin a lo haw leh a, an lawm hle.

PROPERTY

□ Ni 14.11.2013 khan YMA Park-ah thutna siamin hnatiang an nei

□ An Chairman Pu TC Lalhmangaiha chu an nau thihna avangin Mualkhang lamah a zin mek a, dam taka a lo haw leh ngei an beisei.

□ Hun remchang hmasa berah YMA Park-ah an hnathawh hmabakte chhunzawma hnatiang neih leh an tum a, member-te hunawl lo insiam turin an in ngen.

□ Information Mike a hman tur Amplifier tha tak lei an tum.

CWSC FOOTBALL

□ MPL 1st Phase khelh zagh a ni ta a, CWSC chuan player-te lo mikhualtu chhungkua zawng zawng te, riah khawmna tur Zawlbulk/Hall hmantirtu Chanmari West Branch YMA, veng chhunga NGO hrang hrangte leh supporters leh Chanmari West mipuite chungah lawmthu a sawi. 2nd Phase hi January thla 2nd Week-a khelh tan tum a ni.

□ Reitlang FC nena an inkhelh ni a CWFC Fans te tana Ticket 200, (₹ 6,000 man) ngawt mai leisaktu Pu H Lalchungnunga (Machunga), V Sect chungah CWSC chuan lawmthu a sawi.

□ MPL khelh chhunga Player-te chawhlui buatsaih saktute:

Pu John Zosangliana (Manager),
Pu R Lalrinmawia (T-Sect),
Pu H Lalnuntluanga (V),
Pu Lalchhandama Ralte (CH),
Pu R Vanlallawma (Telawma, V) te chungah lawmthu an sawi a.

□ Tin, hneh taka chaw ei khawm thleng thintu-Pu H Lalchungnunga (Machunga-V) te chhungkua, Pu Hlira (T) te chhung, Pu Challianchhunga (L) (T Sect) te chhungkua leh Pu M Sawmliana(T) te chhungkaw chungah lawmthu an sawi bawk. Tin, motor-a Players inkhel hruai thintute chungah lawmthu an sawi bawk. Heng bakah hian vengchhung mi, tanpuina petute zawng zawng chungah lawmthu an sawi tak meuh a ni.

□ Football hruaitu te PPP Mode leh Donation te khawn a, a rang lam a tifel turin an innge.

□ Mizoram State Sports Council buatsaih, Inter Village Volleyball Championship khelh mekah Chanmari West Local Council Mipa Team chuan Final an lut. Mipa Team-te Final luhna kalkawng-Vaivakawn (3-0), Kolasib (3-0) leh Zuangtui (3-0), Semi-final-ah Maubawk Veng (3-2) a hnehin; nimir khan Final-ah Muanna veng nen an khel a, result kan hre hman ta lo. Hmeichhe team in Tanhril 3-0 a hnehin, Armed Veng 2-3 in an hnehi lo thung.

□ Pu Lalthanzuala (T) chuan player-te inkhel tur motor-in a hruai thin a, a chungah an lawm hle.

□ MPL Under-17 player-te leh 3rd Div player-te tournament hmachhawn thei mai tura inthlahdah miah lova taima taka practise chhunzawm zel turin an inhriattir.

MHIP

□ Kum 2013 Handloom/Tailoring Training 1st session chu zagh a ni ta a, hetiang hi result a ni: Tailoring Training, zirlai 15 zingah 14-in an exam a, 'O' grade -ah 9, A+ ah-5-in an pass. Handloom Training-ah zirlai 15 zingah mi 9-in an exam a, tha takin an pass vek bawk October thla atang khan 2nd Session an kal leh tawh a, zirlai 15 ve ve an awm.

□ Handloom training centre-ah hian naupuak puan tlem tah zagh leh tawh a ni a. A lei duh chuan Incharge Pi Vanlalmawii hnena ngaihven theih a ni.

□ Building sak chhunzawm tura hmalak chho mek a ni a, tun thlaah hian sak tan theih tum a ni.

ZOFA

□ Song & Drama programme an neih zagh tawhnaa an Bill-te an dawng fel ta.

□ Rallu Lam Documentary Film shooting chhunzawm leh turin hma an la mek a, a changtute hun remchang lo insiam turin an ngen.

□ December ni 13 hian Thisen Pek Runpui buatsaih an tum a, member-te Thisen pe theuh turin an insawm.

LUNGHLU ROAD

□ An hmabak a hlawhtlin theihna tura bul tantu zinga mi an adviser Pu Lalrammawia Khiangte chuan taksa lamah harsatna tawkin, Damlohma avangin Kolkata-ah a inenkawl mek a, dam taka a lo haw leh ngei theih nan duhsakna an hlan.

□ Lunghlu Road a puitlin theih nan hmalakna chhunzawm zel a ni a, sorkar tharah chak tak leh awmze nei zawka hna an thawh mek kalpui a nihi theih ngei an beisei.

HIMI TUI

**Tui thianghlim tak 207-in
2000 Its. kan pe thei reng e,
a pumpna khawl leh pipe
sei kan nei bawke.**

**Ph. 9120357528, 9612164673
(4-3)**

KEIMAHNI

□ Local Council member-ten min rawn tlawh zawk a, kan lawm viau.

□ Min tawia wmtu zawng zawngte chungah kan lawm hle.

Joint platform-ah YMA**Zawlbulk an sawi****YMA AW report :**

Zirtawp zan khan YMA Park, Chawngbawla section-ah November 25-a Mizoram Assembly inthlanpui lo awm tura Aizawl North III constituency candidate palite tan Mizoram People Forum (MPF) buatsaih joint platform neih a ni a, YMA Zawlbulk chungchang bakah hma an lak dan tur chi hrang hrang MLA nihi tumten an sawi.

Minute 15 theuh hun pek an ni a, Bialtu MLA leh Indian National Congress candidate Pu Lal Thanzara chuan kum nga chhunga a intiam anga YMA Zawlbulk sak puitlinna tur a tihiawtlin loh chhan chu YMA hruaitute'n an nawr tawk lo nia a hriat thu a sawi a, bialtu MLA a nihi chhungan Chanmari West hmasawn nan Rs vaibelchhe 2 vel hman a ni a, mipui mittlunga veng chhung hmasawn nan hmalak zui a tum dan kawng hrang hrang a sawi bawk.

BJP candidate Pu Lalbiakmawia'n hun an pek chhung hmag tluan lovin Chanmari West leh Mizoram tan hma a lak dan tur a tarlang. ZNP candidate Pu RK Daniala chuan bial danga joint platform an neih tawhah YMA Hall tha tak takah hun an hmang thin a, Chanmari West-ah khawlaia hman a ngai bik chu rualawhthlak a ti hle a, YMA Hall tha tak Chanmari West-in a neih ngei theih nan hmalak ngei a tum a, ram pum huapin Mizoram a beisei, mipui sorkar din ngei an tum tih a sawi bawk.

A hnuhnung berah MDA candidate Pu Lalchhandama Ralte chuan a sawi a, veng chhung mamawh hre chiang tawka a inhriat avangin hmalakna tur a sawi tam lo hle a, khawtlang hruaitute'n YMA Park atanga YMA Zawlbulk tlenga lirthei kal theihna tur buatsaih tuma hma an lakna chak taka bawhzui a, tihpuitlin ngei a tum thu a sawi.

Zawh belhnaah Pu Chhantea hian kum hniih leh a chanve MLA a nihi chhungan YMA hruaitute nen thawk hovin YMA Zawlbulk atan sorkar atangin Rs nuai 21 hmuh a nihi thu a sawi a, tihpuitlin a nihi theih nan ngaih pawimawh hmasakah neih a tum tih a sawi lang.

Pu Thanzara'n zagh belhnaah kum nga chhunga veng chhunga hma a lakna thlalak nena tarlanna, Congress siam lehkhlabu 'Hlimthla' chungchangah thildik tawk lo a tel em tih zawhna chhangin a sawifiah a, tihsual a awm a nihi chuan ngaihdam a dil thu a sawi rualin a thawk tu chutute pawh ni se Congress sorkar hnuia hmalakna vek a ni, a ti.

Chanmari West awmna bial Aizawl North III-ah hian veng paruk awmin, MPF-in veng tinah common platform a buatsaih a, Edentarah bultanin Chanmari, Zarkawt leh Electric Venga an neih hnuin kan vengah buatsaih a ni a, Hunthar leh hmawrbawk a ni ve thung ang.